

南董繹由勘本

第十七冊


傳別



			漢書門
	八	八	
	六	七	
	八	七	
二	四	冊	架
冊	架	函	號
類			

內閣文庫			
八	八	漢	
二	八	書	
二	七		
三	冊	號	類
架			

內閣文庫		
番號	漢	8877
冊數	24	(17)
函號	286	187



南疆繹史勘本卷二十五目錄

淺草文庫

雪川溫氏原本

古高場氏勘定

列傳十九

嘉定侯峒曾 子元演元潔

黃淳耀 弟淵耀


張錫眉 龔用圓馬元調夏雲蛟唐全昌

松江沈猶龍 李待問 章簡

睦永明 徐念祖傅凝之戴泐陸厚元

崑山朱集璜 王佐才 陳宏勛

列傳十九目錄



周室瑜陶城陳大任 蘇觀道等附

太倉王 湛 兄淳蔡仲昭魏虎臣 坳常熟徐守貞

溧陽謝 琢 錢國華 廣德吳源長 裘君量

鹽城司石磐 鄆都司 闕名 繆鼎吉 弟鼎言

右鄉兵集義諸臣列傳第十九○嗚呼余每讀
尚書至多士多方未嘗不廢書三歎也當是時
周之克殷有年矣以武周之聖撫循安輯德亦
至矣而故國舊君之感商之民若不能一日忘
周公不得已反覆于天命之去留以消其興亾

之感然則周之頑民殷之義士也南都之建其
君相以見戲亾其國竊怪廟堂之上忠義之士
何寥寥也以爲聖祖列宗培養三百年不應偷
薄至此及觀其後義旅四起率多奮不顧身其
行事不僅以起兵見者既別爲傳茲列其以兵
事相始終者焉

◎溫氏於鄉兵集義者合戰守禦不分路所不
分主從後先棼序其爲文亦多脫節處今案史
勘補每首以引跋爲之區別焉睦廣文舊誤作

睦崑山一路原軼朱集璜等名僅見於目其謝
吳司艷等文原本列諸後卷謝琢或作球以其
字石攻言之則非球也

南疆繹史勘本卷二十五

列傳十九

侯峒曾字豫瞻號廣成太倉嘉定人給事中震暘子
也登天啓乙丑進士顧秉謙欲招致之畀以館選峒
曾不往謁已授南京兵部武選主事以憂歸崇禎初
尙書張鳳翼薦爲職方郎中辭改南京文選主事轉
稽勲郎中江西提學參議尋拜浙江叅政分守嘉湖
漕卒擊傷秀水知縣李向中峒曾請於撫按捕戮首
惡于是部內肅然吏部尙書鄭三俊舉天下賢能監

司五人峒曾與焉擢順天府丞未赴而京師陷福王時起左通政引疾不就南都潰奔避鄉舍乙酉六月李成棟以水陸兵駐吳淞多剽敎民憤甚揭竿四起團練鄉兵破成棟舟師于新涇遂城守爲自保計推峒曾爲主逐新令張維熙與里人黃淳耀張錫眉龔用圓馬元調夏雲蛟唐全昌等慷慨誓師分門固守設謀備禦西窺太倉東扼吳淞各邑響應數發兵攻城城中出兵邀擊一敗之于羅店再敗之于倉橋成棟怒大修戰具破婁塘逼太倉自率銳師來攻峒曾

乞師于總兵吳志葵志葵遣遊擊蔡祥以七百人赴援一戰失利束甲遁外援遂絕矢石俱盡七月三日大雨城崩一角架巨木支之明日雨益注城大崩成棟薄東門上峒曾與其子元演元潔猶立睥睨間指揮巷戰鄉民爭欲扶之去峒曾曰我旣與城守城亾與亾去何之趨歸拜家廟將溺于池叱二子速走避二子痛哭願從死相抱入水未絕而兵至鉤出之取峒曾首號令徇城有金生者夜竊其首藏篋中峒曾之叔自野輿棺入收其屍方殮有哭聲自外來者則

金生負篋至也

勘本曰侯參政提學江西時益王勢方熾當歲試黜其宗生名二王怒遣使誚讓不爲動江右人頌其公明謂數十年所未有也初有給事中耿始然奉命督賦至監司以屬禮見參政不可獨與抗行一時剛正之譽達帝都焉

黃淳耀字蘊生號陶菴幼好學性冲和湛靜喜怒不形于色至談古今忠義名節侃侃持論不少假借登崇禎癸未進士見天下亂人猶營進不已遂賦詩南

歸福王立不謁選 大兵圍城佐峒曾調兵禦守城破淳耀與弟淵耀入草菴菴僧無垢與淳耀爲方外交曰君未受職可以無歿淳耀曰忝名進士宜爲國歿今托上人歿此清淨土足矣索筆書曰進士黃淳耀歿此嗚呼進不能宣力王朝退不能潔身自隱讀書寡益學道無成耿耿不沒此心而已與淵耀分左右就縊年四十一暴尸七晝夜神色不變淵耀字偉恭諸生律已嚴恪與其兄相師友講誦勿輟至是怡然偕歿

張錫眉字介茲崇禎庚午舉人素有志行嘗孤館獨坐一女子窺之投簪几上正容不動明日卽辭歸亦終不言也歲大祲力請有司發粟賑之復募瘞道殍者以千計故人葉生無嗣歿後葬其兩世好行其德如此城破自經妾何抱女赴水歿龔用圓字知淵天啓辛酉舉人選秀水教諭乙酉棄官歸龔氏自宋元來稱文獻家兄用廣方嚴有操用圓精研經學互相師友鄉人稱之城破兄弟皆自溺馬元調受學於邑人婁堅有學行時年已七十矣夏雲蛟字啓霖家貧篤行好學與淳耀齊名城破並見殺唐全昌與其妻同歿三人皆邑諸生

沈猶龍字雲升松江華亭人萬厯丙辰進士除鄞縣知縣徵授御史崇禎間進太僕少卿拜右僉都御史巡撫福建妖賊張普薇等作亂江西猶龍遣游擊黃斌卿協勦大破之增秩賜金後以招降鄭芝龍威名特著遷兵部右侍郎總督兩廣軍務兼廣東巡撫甲申冬福王召理部事不就明年南京覆列城望風下閏六月吳淞水師提督吳志葵自海入江總兵黃蜚

亦擁千艘由無錫來會共結水寨於泖湖適大兵
遣安撫官至有常指揮者徧括郡人物郡人苦之執
殺之共推猶龍起兵猶龍乃偕邑紳李待問章簡等
募壯士數千爲城守計與志葵蜚相犄角八月初我
兵至以輕舟截春申浦大戰乘風縱火二將舟重不
能運潮落風烈水師多盡二將皆被執郡城遂圍降
紳董廷對將內應事覺郡人磔殺之已有假黃蜚兵
號者突至猶龍以爲信開門納大兵以紅巾抹首
隨之入俄而巾脫皆辮髮也衆大驚誼呼城破矣守
卒盡潰猶龍出東門中流矢歿于濠待問字存我崇
禎癸未進士授中書舍人工文章精書法殺于織染
局初待問夢袍服間有字曰天孫織錦以爲中翰兆
也至是竟歿所簡字坤能天啓甲子舉人嘗爲羅源
知縣守南門被執不屈歿

華亭教諭眭明永字嵩年丹陽舉人共城守以書戒
其子曰北兵已渡江我自謂有二不可生平居節義
自命且以勉人一也賦性鯁直觸境輒動二也且我
父命我名修短視明三也城破題詩明倫堂自縊尙

寶司丞徐念祖及妻張二妾陸與李俱投繯歿有舉人傅凝之者叅志葵軍黃浦之敗與諸生戴泓赴水歿衣工陸厚元城陷積薪于門語其妻曰能完節乎曰能厚元舉火以其妻子女皆焚歿

崑山朱集璜字以發歲貢生素有學行爲鄉井所推重教授弟子多至數百人數論郡邑利害當事咸信聽之南京旣亾邑人議拒守而縣丞閻茂才已遣使投誠用爲知縣衆乃執殺茂才以六月望推舊將王佐才爲兵主參將陳宏勛前知縣楊永言各率壯士

百餘來助里中周室瑜陶瑛陳大任等亦舉兵應之佐才卽崑山人嘗官狼山副總兵年老乞休於家大兵至宏勛率舟師迎戰敗還遊擊孫志尹陣歿城遂陷永言遁去佐才縱民出走已獨冠帶坐帥府被殺集璜投東禪寺後河歿門人孫道民張謙同日歿室瑜舉人嘗官儀封知縣城破與子朝鑛同歿妻諸被執不辱歿之朝鑛妻王自縊瑛諸生受業同里蔡懋德所居雞鳴塘去城二十里誠困率鄉兵赴援未及已潰還家自經大任貢生倡義迎佐才以其宅爲

帥府城既破所親擁之出已復入歿之妻張子思翰
皆赴水歿

勦本日集璜以下六人溫氏有目無文今纂補夫
崑山一彈丸地也處水陸孔道無險要可憑當時
顧名思義者猶得爾許人復有以守禦歿者曰蘇
觀道莊萬程陸世鏜陸雲將歸之甲周復培陸彥
冲代父歿者有沈徵憲朱國軾救母歿者有徐洛
從容自盡者有徐澂王在中吳行貞等

太倉王湛字道廣諸生性剛毅州城已下牧曉諭薙
髮乃慨然語其兄淳曰弟誓與髮爲存亾也卽集里
人陳說大義聲與淚俱衆云若欲何爲湛曰新牧強
劫民吾以衆姓當無不摧陷者王固巨族里中重之
於是從者數百人淳湛與其友蔡仲昭魏虎臣橫刀
前驅圍州城城中官吏登陴笑曰此烏合耳何能爲
舉砲擊之衆皆伏地不能傷始訝曰此知兵者遂傳
令禁舉火以虞內變三日突煙不起人聲寂然衆謂
其怯也以板扉遮矢石薄城呼譟越日暑甚衆單衣
揮汗荷戈直抵壕畔自辰至未饑且疲解衣少憩守

者驟開門以十二騎突馳之遂大潰淳先受傷赴水
歿湛砍一騎未及亦被斫歿仲昭虎臣俱戰沒

勘本曰凡酉戌之間以世臣而殉於國事者崑山
顧文康公鼎臣曾孫延安推官咸正錢塘知縣咸
建暨弟舉人咸受推官之子天達天遴江陵張文
忠公居正孫侍郎同做又益之以允修餘姚孫文
恭公如沂孫相國嘉績長山劉公鴻訓子都督孔
和嘉善錢公士升子吏部棟又益之以柵長洲文
文肅公震孟弟舍人震亨子秉華亭徐文貞公階

族孫中丞孚遠又益之以念祖烏程溫氏體仁家
有徽州推官璜秀水朱氏文恪公國祥家有大定
東阿于氏文定公慎行家有元晁宣城邱氏瑜家
有之陶而後此鄞縣錢忠介公肅樂家有諸弟簡
討肅範監紀推官肅典職方主事肅璘輩皆相繼
歿國此太倉王氏弟兄爲文肅公錫爵後人也崑
山朱集璜亦爲文靖公天麟族人後文靖子行人
斗垣殉孫可望犯闕佗如湖州朱文肅公國楨前
有諸孫都督僉事鑑如於甲申闖賦之難歿後有

諸孫某於辛卯起兵南潯歿若而人者皆膏梁之
亂胄末路之英雄也或擊馬埋輪或沉淵伏劍均
不可以成敗論溫氏原本事或有傳有不傳名或
有見有不見楊氏跋語云晒園孝廉世居輯里去
文肅家朱氏不數里其作史時去鼎革未五六十
年而纂東南歿事傳於鄉曲之忠義亦多滲漏何
與夫天地剝復之變有攀鱗附翼佐新命以興者
則必有赴湯蹈火惟故主是殉者蓋當歿而歿謂
之義可以歿可以無歿與萬萬不必歿而竟歿則

於義之中又竒焉者也此千古之竒人千古之愚
人也吁其愚不可及也凡此世臣中之望扁而得
所攷證者咸於摭遺補稟

佚史曰常熟諸生有徐守貞者奉母避兵於鄉鄉
兵起守貞以母病不能遷兄守噩謂之曰爾去我
畱方相讓而兵至守噩遁母與妹俱投井守貞亟
從之兵挽其髮乃踞坐謾罵殺于井傍其友馮知
十見其遇害奮臂格鬥俄而亂兵至叢箭以歿
古高場氏曰守貞非集義從兵而歿乃奉母避

兵而歿者也原本載此初不允當無已以佚史
曰別之爲埒明其不與義兵爲類也

諸生集義者溧陽謝琢廣德吳源長鹽城司石磐如
臯興化張明聖等皆一時蠡起而戰功以東場鹽丁
繆鼎吉兄弟爲最謝琢字石攻兵備僉事鼎新子與
溧陽副將錢國華同日起兵士卒欲取餉民間琢毀
家應之不繼而潰被執命輸資琢曰我大明諸生豈
以貨活哉乃飲刃歿國華遥奉宗室瑞昌王者兵敗
至對埠見殺吳源長太學生舉兵梭子山民人裘君

量等破家鳩衆合攻廣德城破之至湖州戰敗受執
俱歿司石磐與鹽城都司鄆某同領鄉兵旣潰縛至
淮安見大吏挺立不跪鄆欲脫之曰此儒生吾刼之
爲書記者石磐大呼曰公言何謬吾實首事奈何諱
之下獄六十餘日狂歌痛飲酣詈不輟與鄆皆伏法
繆鼎吉鼎言兄弟也俱絕有力淮人王翹林等奉宗
室新昌王克鹽城興化鼎吉以其徒應之刼殺官弁
鋒銳不可當官兵至鼎言持長矛掠陣奮力擊刺叢
箭而歿鼎吉仍糾衆攻城屢有斬獲衝其營不爲動

轉戰不息以飢不得食被禽大帥愛其勇欲釋之不
屈乃殺之浙東俱贈參將其餘十二人亦並歿事皆
在乙酉秋間也

佚史曰夫自

王師南下諸郡文武吏爭獻版籍開門迎附卽用
爲守而江南副總兵吳志葵者吏部主事夏允彝
之門生也頓兵海上獨不屈先是有十將官者集
衆千餘屯陳湖中湖旁諸生陸世鑰慮其爲亂亦
聚千餘人名爲犄角實防遏也適薙髮令下鄉民

駭愕而吏胥乘勢魚肉之民乃沟洫思亂十將官
因之邀世鑰起兵殺吏胥而焚其舟于是松江兵
科給士中陳子龍舉人徐孚遠章簡陰與陳湖兵
通志葵與參將魯之璵率舟師三千自吳淞江入
澱泖將窺蘇州允彝出入軍中飛書走檄聯絡士
大夫四方聞之爭爲嚮應華亭則總督兵部侍郎
沈猶龍下江監軍道荆本徹中書舍人李待問嘉
定則左通政使侯峒曾進士黃淳耀總兵蔣若來
崑山則鄖陽撫治僉都御史王永祚編修朱天麟

吳江則職方吳易總兵黃蜚太倉則總兵張士儀
宜興則行人盧象觀南則連于徽州僉都御史金
聲西則達于浙中嘉興吏都尙書徐石麒翰林屠
象美嘉善職方監軍錢柟知縣錢默平湖總兵陳
梧海寧舉人鄭宗彝等兢以家資助軍爲恢復計
方我

大清之下金陵也兵數十萬杭及蘇克又籍郡邑
丁壯薙髮以充勢益盛其一軍駐金陵一軍駐蘇
一軍駐杭一軍駐沿海吳淞等處允彝計欲與志

葵入據蘇州扼斷首尾石麒等率嘉湖民兵子龍
孚遠柟默等聯絡浙東西之衆并力抗守峒曾率
其邑兵照會海上之師荆本徹張士儀等駐劄海
口合句容溧水溧陽宜興之兵直走南京馳檄九
江督袁繼咸及江楚江北諸宿將觀望順逆間者
使倚艦江中伺官軍還渡半濟而後擊之定計約
蘇州捷音至尅日同發而志葵所率海上軍素怯
方攻蘇州副將魯之璵領三百人先登斬胥門入
我帥匿其騎于盤門府學宮中兵入城行四五里

不見敵內自疑欲退騎兵突出馳之三百人皆陷之璵以門歿于是各軍爭思引退志葵不能止允彝流涕遍拜之得少留時吳中民兵十餘萬賈客僧道咸來助力及嘉興平湖嘉善華亭清浦上海崑山常熟江陰溧陽句容鹽城興化所在多揭竿集義嬰城爲守得首級輜重器械無算然諸民兵皆猝起無甲仗無馬匹餉之所入什不償一我帥之駐蘇者據倉廩憑堅城方聞外變督令薙髮日急又慮民或墜城出則嚴禁諸門率騎巡邏不薙

輒殺日殺千數人民不能存無已迺如令薙髮旣薙卽編入降隊驅之登陴守禦志葵數出兵仰攻以不得入而潰浙中及沿海諸旅時復四出攻敎所圯郡邑邑紳懼禍乃潛通官軍或引以攻或約以應或執或殺瞬倬殆盡計其始末僅百日云

南疆繹史勘本卷二十五終

南疆繹史勘本卷二十六目錄

雪川溫氏原本

古高易氏勘定

列傳二十

江閻應元

陳明遇

許用德

馮厚敦沈鼎科戚勛夏維新等

黃毓祺

徐趨

鄧大臨

金侯承祖子世祿

右義兵守禦諸臣列傳第二十○江陰小邑也

城守之嚴江以南無過此者則賴于典史閻君也侯指麾之守金山衛亦如之◎當時天兵南下所嚮不血刃其以一郡抗命者浙東之金華江右之贛以一邑抗命者惟涇與江陰也至如金山舟山不過江海中一孤島如黑子如點螺而竟亦頓戈相搗多所夷傷至使諸將皆以爲南下所未有殆於二京有光也與

南疆繹史勘本卷二十六

列傳二十

閻應元字麗亨順天通州人崇禎中爲江陰典史甲申海盜顧三麻以百艘乘潮至黃田港應元率鄉兵往禦手殪三人寇退以功遷英德主簿道阻未赴寓居江陰乙酉南都亾列城皆下檄至江陰閏六月朔諸生許用德倡言于明倫堂曰頭可斷不可薙衆曰然則城守乎相與設太祖像拜且哭遠近應者數萬人推新尉陳明遇主兵以徽人邵康公爲將前都司

周瑞龍泊江口相犄角與 大兵戰失利明遇曰我
不如閻君智勇可屬大事馳騎迎應元應元率家丁
四十人夜馳入召士民盟之曰今日之事非有所強
于諸君者諸君其無以生歿計問有餉乎徽人程璧
前曰璧願輸三萬五千金以助又問有軍實乎明遇
曰前兵備所製裝械故在也發之得火葯三百罌鉛
鐵丸千石大礮佛狼機千張應元下令曰輸不必金
凡菽粟芻藁布帛酒醕鹽醢皆是也城苟完何患無
財否則身且不保遑恤乎家衆曰諾于是集餉治樓

櫓修堵堞戶出男子一登陴守餘丁傳餐已乃分城
列甲令鄉兵伏四郊斫遊騎部署甫定內外圍合當
是時 大兵南下若破竹守土吏非投誠卽棄走間
有拒者攻之輒拔遲不過旬日耳及至江陰境輒多
賊殺乃相與大賊于是 大兵薄城下者且十萬列
營數百圍十重依尹山起壘下瞰城中矢集如雨城
上襍發礮礮之屬夜遣壯士縋城下順風縱火軍亂
自相譟蹈踐歿傷萬計營乃移居民黃雲善弩傳以
毒葯中人輒斃陳瑞製水銃近者糜爛應元出新意

造鐵鎚繫以長繩能于城上刺人十步外 大兵力
攻既久遂架大砲來擊城裂應元用鐵葉裹門板貫
鐵索護之取空棺實以土障潰處命人運石視闕者
壘焉又嘗以矢盡束藁爲人夜立陴隄間擊金鼓大
譟若將縋城襲營者 大兵驚矢乃蝟集獲無算凡
守禦之法殫極智巧大軍乃濟師時劉良佐已歸命
遣之來攻臨城呼應元語應元曰我一典史蟻蝨臣
耳猶不忘故國汝爵爲列侯握重兵不能捍衛疆圍
而乃反戈前驅有何面目向我耶良佐慚而退八月

松江破李成棟率所部十四萬至驅吳志葵黃蜚作
書招降志葵至城下陳說利害蜚不語應元叱曰汝
等不能斬將搴旂爲所縛歿已晚矣何喋喋爲會中
秋給軍民賞月錢分曹攜具登城痛飲許用德製樂
府五更轉使善謳者曼聲歌之其聲悽惋 大兵聞
者皆泣下應元偉軀幹性嚴毅號令明肅犯者不稍
貸然輕財與中賞輒逾格傷者親爲裹創歿則酌酒
哭之明遇浙江人居官以寬厚稱毀家徇義善撫循
往往流涕相勞苦士故樂爲之歿雖知危急不少變

外兵既盛攻愈急礮聲徹晝夜城中死傷日積矢石亦盡猶固守自如二十一日大雨如注城傾大兵蜂擁上應元巷戰所當披靡奪門得出投于前河水淺不灰遂被執良佐持之泣應元曰灰耳何泣爲見大帥貝勒不屈鄰灰于棲霞禪院用德明遇舉家自焚灰城中屍骸枕籍街巷幾塞男婦投池井皆滿攻守凡八十一日竟無一人降者而大兵之灰者亦六七萬嗟乎應元守善矣惜所守者小耳使兩京得如應元者守之其亾或有待哉唐王聞之泣曰吾家

子孫遇江陰人雖三尺童子亦當加敬也應元至今廟食江陰訓導馮厚敦字培卿金壇人城破詣明倫堂冠帶南向以自縊妻王氏與其孀妹結衽投水灰其邑人灰事者兵部主事沈鼎科字銑臣辛未進士自縊灰家人藁葬之兵鑿棺取其首中書舍人戚勳字伯屏甲申假歸至臨清聞國變土人欲留之參軍勳曰非我灰所南渡奉命督閩餉事畢而國亾佐應元守城城陷召妻及子女子婦授之巾悅視其縊北面再拜自起舉火火熾乃投入從灰者十二人流虜

者武進舉人夏維新諸生呂九韶王華常郡降避之
江陰至是皆痛飲自刎踰月有歸姜者不知何許人
入城自擲歿

勘本曰江陰之初海寇至縣尹李令哲以攝靖江
事去丞簿選懦城虛無所備一時男婦奔竄閭君
乃曉諭止之卽領鄉兵拒戰手射賊三應弦倒氣
懾始揚帆遁巡撫狀聞以欽依都司掌微巡得張
黃蓋後循資遷秩廣東道遠會母病遂廝縣東之
砂山其代者爲陳君明遇也城圍時劉良佐用牛

皮帳急攻東北隅武舉黃畧以砲石悉力擊之良
佐乃移營十方菴令僧向陳利害已復策馬薄城
下招之閭以大義詰責迺慙退許用德一作許用
字孝孺所製樂府雜刁斗笳吹以曼聲度之竟三
日夜北來軍卒多廢戈竊歎城陷時有紅光突起
如綫由土橋而西官兵從祥符寺後登閭猶懸吳
相接奪門門閉度不免躡身入水不沒頂被執不
屈刺其脛踣地暮擁入棲霞禪院夜半僧聞大聲
嘖邀斫我者再已乃寂明遇搏戰被殺手握刀僵

立不仆用德於前數日驅妻子一室自焚歿程璧
字崑玉先助貲後卽身赴吳淞乞師於吳志葵師
至還新安去

古高易氏曰江陰破官軍謂其民之櫻城久抗
也男則僇之女則俘之幾無所子遺有戚三者
項已中刃血暈仆城下獨不歿賴王氏已被俘
乃匍匐禱於漢壽亭侯祠夜夢神書示戚三二
字曰此爲汝贖賴者醒而嘆曰我戚三也烏得
有其二而贖我賴哉已矣乃野哭至曙暮有一

人自蕩間出悵悵而前詢之則亦尋賴者盛三
也戚懼然念夢中戚三當是此盛三之譌遂同
行至江寧二人出所謂招帖者於道或有來告
戚賴所索酬金戚曰我實無金向所言誑耳或
曰然則何以言贖曰我固能書姑出此揭求一
消息亦幸也或慍拂衣出戚挽之泣其人咨嗟
少留尋視其揭俛首曰若苟善於書今有客僱
書首楞嚴者百部于報恩塔是可得值也戚乞
其爲介卽受傭而半貸之得金十贖之綠旗郝

將軍所郝嬭有詐心陰受金而賴爲無有且鞭
逐之時盛三同逞泣曰此金非佗江陰戚三備
書以贖嬭者也城陷家破所不憚歿以備此金
爲嬭計嬭不還而金失豈謂城陷時不歿而復
不能歿此耶吾盛三也敢同戚三來敢不令戚
三獨歿迺大號而大譁聲震諸旗於是郝將軍
者出義之許以嬭還及還則盛三嬭也相對愕
然先是盛嬭被俘密書驛壁曰江陰盛三嬭在
郝將軍旗而盛字中蝕有似於戚故告者之誤

盛爲戚而指以所盛三曰奈何以戚三金而爲
盛三嬭贖願吾夫嬭俱鬻諸旗還戚值卽佐之
覓嬭戚曰吾毋庸有紅旗張將軍者需役因薦
得值金二十盡予戚而留戚於旗下旣晚除馬
通聞傍室嬭操里音盛亦操里音作歌曰二十
一是七三託我尋汝來江南少頃內嬭亦微吟
曰一十一是王氏願爲七三告七四盛迺大喜
曰是矣急呼戚至躡之而嬭已佗徙次日盛偕
戚語郝郝預爲過探得實遂同詣張請贖張執

不可且曰是嬭有色值金多且嬭已留此何贖
爲二人固爭之郝亦力解勢無如何久之盛揮
已嬭出訣曰吾與戚三同來義不可獨還今戚
三以備書金贖汝書尙未盡償而吾與汝徒鬻
身無以報戚何用獨贖汝汝仍還郝吾與戚同
去赴江水歿以嬭交郝以值返張二人拜郝及
張卽牽臂出且號且行而戚嬭與盛嬭俱擲身
大哭時張之旗有願出金代贖者有迸涕者有
束手相歎者張心動遽起謂郝曰止予安惜一

嬭以全兩家骨月哉雖然嬭值不止是而減值
以贖則無以示來者且此值盛值也盛爲戚鬻
身而予何能獨遣戚而反留盛因竝遣盛三戚
三而以金二十令分之爲歸里貲于是上下懽
呼男女各羅拜謝去比過傭書所二人夫嬭皆
能書請各爲書以償主者感之不聽遂合書一
部貯報恩塔而盛三夫嬭所書經悉署戚三名
戚三夜夢神持卷令之改盛字嗟乎戚三也盛
三也夢也神也而戚爲義理之所感也惟足於

義理而始可以感紅旗之張將軍

江陰貢生黃毓祺字介茲與弟毓初好學有盛名毓
祺精釋氏學性慷慨其門人諸生徐趨字佩玉亦以
氣節著江陰城守毓祺與趨起兵行塘以應魯監國
遙以授兵部尙書賜勅印城破毓祺亾命淮南與其
黨棲山中明年冬偵城中無備率王春等十四人來
襲不克俱歿趨被獲見縣令劉景綽長揖不跪左右
叱云非爾父母官耶何不跪趨厲聲曰此故明降臣
何父母爲令壯其志擬釋之言吾知子非謀逆者豈

有所親在獄欲篡取之耶曰我何親在志不忘故國
耳令曰若然子必歿耳曰我固不欲生而遂爲此也
令言子誠竒士吾將薦之以官趨乃笑曰汝爲明進
士位至監司亦不庠矣今降而爲令汝官且不能自
擇而爲我擇官乎令言吾非得已徒以吏隱耳曰汝
外吏欲去則去天壤甚寬何致含羞苟活貽青史玷
哉令大慚連呼送獄丁亥正月八日殺之已而捕同
謀者毓祺旣遠逸乃收其二子大湛大洪兄弟爭爲
歿時毓祺在泰州寄書所善江純一者猶用故時官

印純一之容持之純一懼遂告變毓祺見執入江寧
獄命其具供奮筆大書曰道重君親教先忠孝避禪
已久豈有宦情義憤激中情不容已明主嘉誠遣使
授職招賢選士分所應然哀憤曠官歿有餘辜謹
抱印待終身附子卿之義已丑三月獄成將刑門人
鄧大臨告之期命取襲衣自斂趺坐而逝當事戮其
屍大臨號泣贖之歸葬變服爲黃冠去大臨字西起
常熟人大湛等輸入官配功臣家鄉人歛金贖之教
授毘陵弟子頗衆有學行不愧其父妻周氏歿節甚
烈有邵長蘅爲之傳云

勘本曰邑令之言直無羞惡心徐君佩玉刺刺如
剝筍逾剝逾精大是快人也黃君介茲爲友所誤
卽所謂故勅獄江之南以此牽絀頗不少

金山衛指揮侯承祖字懷玉世襲其職松江兵起集
諸鎮議乃以兵往願襄事提督吳志葵忌之沮其謀
承祖恚曰然則府城聽之總戎承祖以金山爲存亾
耳遂拂袖歸與子世祿治兵嚴禦未幾志葵敗松江
亦破大兵進攻金山承祖坐睥睨間親冒矢石緣

城上者手刃立盡屢進屢卻久不能拔至八月二十四日江陰城陷李成棟還師來助守卒皆疲俄有內應者啓水門以入承祖率世祿親兵等猶巷戰踰時衆且盡世祿身受四十矢被獲罵成棟不絕口見殺承祖亦被執說之降曰吾家自始祖以開國勲子孫不替食祿二百八十年今日不當一歿報國哉至文廟前曰此吾歿所望先師再拜飲刃歿

勘本曰侯氏父子真所謂勇於大義者夫金山地不及一丸衆不及一旅雖則懸險江心而守亦何能以久且不必言其四面受敵也餉道一梗便成俎肉矣惟激於義憤而爲之者初不以成敗計也是真不愧其爲開國勲臣之後彼身膺大將符而囚首喋喋者眎此得無媿歟

南疆繹史勘本卷二十六終

南疆緝史勘本卷二十七目錄

雪川溫氏原本

古高易氏勘定

列傳二十一

寧邱祖德 錢龍文沈壽蕘

麻三衡

涇縣尹民興 趙初浣吳漢超

池州吳應箕 青陽龐昌胤

江上盧象觀 方明 倪文煥

葛麟 無錫顧杲

廬馮宏圖

周損

傅夢鼎

傳謙之桂蟾僧義堂侯應龍王焮

明四王

翊弟翊附王

江

沈調倫趙立言子楨

右上江鄉兵皖浙山兵列傳第二十一◎宛陵

涇川之兵以城守池則進來游剝而已盧幼哲

陽羨人也顧子芳錫山人也而皆次名於此者

以其起自京江入太湖復與皖浙相噓應若王

篤菴稱大蘭洞主則尤井井成列者也溫氏原

文綜錯茲竝合之爲一卷

南疆繹史勘本卷二十七

列傳二十一

○寧國之兵主之者邱巡撫而麻生等附諸也

邱祖德字念修成都人崇禎丁丑進士授寧國府推

官以才調濟南超授按察司僉事分巡東昌十四年

夏給事中張元始上言土寇與流寇異土寇皆饑民

耳聚則盜散則農計莫善於撫今祖德既受殊擢宜

令專理撫事帝從之寇多解散以功遷右僉都御史

巡撫保定後代王永吉巡撫山東京師陷闖賊以檄

招降祖德斬其使中軍梅應元叛入劫印祖德將自
芻士民衛之出境遇魯王於道同之過淮福王時御
史沈宸荃嘗劾其輕棄封疆削籍久之獲雪時四川
大亂祖德無家可歸乃流寓寧國南都既覆乙酉閏
六月金聲起兵績溪祖德與寧國舉人錢龍文諸生
麻三衡沈壽蕘等各舉兵應之時郡城已失祖德駐
師華陽山糾集別部顏苗王一衡金經萬日吉等十
餘部共攻郡城不克壽蕘陣歿祖德退歸山中七月
下旬大兵攻拔其寨獲其父子送江寧不屈磔歿

閩中贈太子太師吏部尙書壽蕘字景山都督有容
子也

麻三衡字孟璿宣城人布政使溶之孫生有異相長
好習武事與同邑沈壽民梅朗中銅陵徐律時蕪湖
沈士柱並知名于時以詩酒自豪既起兵與旁近諸
生吳太平阮恆阮善長劉鼎甲胡天球馮百家號稱
七家軍皆諸生也三衡駐兵稽亭每戰策馬當先舞
大刀陷陣人多望而畏之後以衆寡不敵被獲賦絕
命詩殺于江寧七家皆歿

◎涇縣城守堅似江陰久而始下尹令主謀吳生
主戰也原本尹民興傳闕今纂補

尹民興字宣子平陽人崇禎初由進士授寧國知縣
調繁涇縣除奸蠶蠹民頌神明行取入都爲陳啓新
所訐謫福建按察司檢校尋以兵警疏陳時務十四
事帝嘉之召爲職方主事數召對稱旨卽擢本司郎
中周延儒出督師命從軍贊畫延儒被譴亦下吏除
名久之始釋南渡起故官旋謝病歸流寓於涇南都
覆與邑諸生趙初浣宣城諸生吳漢超等據城堅禦

民興多智善謀 大兵攻之損傷最多久乃克謂不

亞於江陰之戰也初浣字雪度城破被殺民興走入
閩唐王授兵部郎中行御史事聞亾歸卒於家

吳漢超字許公宣城諸生爲人強直有膽決深沉不
露甲申之變哭於廟與其友湯廷鉉謀募師赴難會
福王立乃止已而南京覆慨然曰天下事遂已乎議
保寧國境無應者乃走涇縣從尹民興起兵城守相
持最久不減江陰漢超力也師潰匿華陽山中先當
塗人徐淮聚衆駐華陽聞漢超名禮而致之遂合兵

連破句容溧水高淳溧陽太平諸縣漢超曰我兵少聚而守城則無以攻戰我以遊騎四出使禦者疲於策應此伍員報楚之智也以故所克州縣皆不守然是時民心既渙漢超復無以撫定之徒事一亂而已丙戌正月四日襲寧國夜緣南城登同知王家梁勒兵巷戰寧國爲漢超鄉郡人各顧其家莫有鬥智遂潰訊俘卒始知漢超爲之主于是圍其家令曰不出其族漢超已出城念其母在且恐累族人乃歸歿問其同事曰郡中十萬戶誰非吾黨不可以一二數臨刑終不屈膝剖其腹膽長三寸妻戚氏墜樓歿

◎池州奉朱盛濃爲號副貢吳生兵應焉

吳應箕字次尾貴池人善今古文辭意氣橫厲一世復社領袖也崇禎壬午以鄉試副榜貢入京公卿以下咸加禮異視其臧否爲榮辱先阮大鍼在南都應箕率諸名士出防亂公揭譟逐之大鍼不敢較然憤甚欲得而甘心焉後周鑣下獄應箕獨入視大鍼急捕之乃乘夜亡命去南都不守起兵應金聲攻池州復建德東流數縣旣而潰匿婺源祁門界被獲不屈

將戮之市應箕曰此非歿所至松林曰可矣一卒以
刀擬之叱曰吾頭豈汝可斷耶乃伸頸謂總兵黃某
曰以此煩公遂歿
龐昌胤字載玉西充人崇禎丁丑進士知青陽縣國
亾棄官隱九華山與邑人孫象壯謀起兵事洩被執
行至五溪橋旅店夜扃戶卧明日呼之則歿矣卒不
知其如何而歿也

◎江上之師起自宜興盧中允後方都司葛中書
皆與之合而無錫顧生起兵來應中途爲人所害
以不明不白而歿其智之不若於才與惜哉

盧象觀字幼哲故山西宣大總督兵部尙書象昇之
弟也崇禎癸未進士授金溪知縣未仕改中書舍人
象昇智勇知兵有謀畧威望兼著象觀習其家學以
仕晚未獲用 大兵南下象觀與宗室子遇西湖相
與痛哭入于忠肅祠誓同起兵至茅山以督部故將
陳坦公爲先鋒多所殺傷謀攻南京都人朱君兆奇
士也爲之計曰京城雄深未易拔况北兵四面萃於
我敗道也公盍謀內應者乎象觀曰君意若何曰城

中之豪素與君兆習願爲公先入公定期告我我從
中以火爲應已而遣僧詣君兆約之期僧乃密叩
大清營告變密誅君兆嚴備卽舉火誑之象觀兵薄
城下燒太平門騎兵突出衝擊象觀駭敗精銳盡喪
宗室子匿水竇中得逸復與象觀至宜興稍收士卒
攻溧陽又敗象觀遂入太湖去廣德屯田都司方
明字開之與吳興豪傑素相結起兵據廣德乃迎宗
室子入其軍號召義旅連破孝豐臨安寧國等縣聲
勢頗振聞中聞之封宗室子爲瑞昌王方明等授官
有差無何降將張天祿自徽州還師明不能禦棄營
走浙東有潘文煥者鎮江人匿瑞昌王於茅山民舍
久之其部曲喜正赴京口置弓矢事覺有司捕之襍
治之遂殺王王名盛瀝也事連文煥文煥見喜正切
齒罵曰吾歿何足惜王能一日在則人心一日未散
鼠子乃壞吾大計奮起批其頰其子哭文煥曰我歿
忠汝歿孝傳之後世有頌述焉不然一老氓也誰復
知械至金陵洪承疇欲屈之不可乃被殺一女亦不
食歿逾年丙戌明還長興衆疑爲謀者執付防將郭

虎所一小卒指曰此方明也遂斬之象觀之入太湖與葛麟王期昇合有衆二萬奉通城王盛澂居長興是秋八月二十又八日陣於小湄鏖戰久之麟敗歿象觀知不免起拜其衆曰我兄弟受國恩無以報空煩公等歿有餘愧躍入水部下掖之出歎曰愛我者不如成我義也復自沉於淵以歿先鋒副將陳坦公總兵毛重泰俱歿之

勘本曰盧允中英畧稍視其兄忠烈公而文采過之幼與齊名舉崇禎十五年鄉試第一忠烈公嘗言功成築湄隱於桃溪間壩簾可樂也乃竟不得遂其志各以國事殉嗟哉

葛麟丹陽人與盧象觀同舉於鄉生有膂力額類武夫能開數石弓福王時巡撫祁彪佳薦其才勇授中書舍人與鄭鴻逵協守京口上便宜十二事又請練兵江北皆不報京口破過家門不入徒走海上佐總兵吳志葵起兵攻復青浦志葵敗且見擒潰卒無所歸推麟爲帥麟乃揚帆抵太湖時職方郎中王期昇奉通城王立寨西山因與之合未幾象觀亦至軍遂

盛期昇性貪不能軍惟以剽敎隣近爲事民苦之引
大兵焚其舟期昇遁象觀危甚麟望見火光率三舟
衝之軍吏曰衆寡弗敵毋陷歿地麟曰臨難不救同
盟之謂何手搦長矛奮力戰所當披靡連殪百人於
湖 大兵耳其名羣目之譟曰長而肥者葛中書也
萬箭注之麟揮矛如風箭悉墜入水乃更攻以火火
及舟舟焦始自沉

顧杲字子方無錫人光祿卿憲成從子爲人豪邁尙
義以名節自任憲成講學東林書院清流偕之遂爲
東林黨魁人皆引以自重杲名因是亦逾起阮大鍼
附璫削籍僑居金陵聯絡逆案失職者刼持當道且
思結納後進以延時譽乃蓄名謳製新聲日置酒高
會一時近風雅者多歸之禮部主事周鏹惡之倡議
草檄以討名曰留都防亂公揭列名者百四十餘人
皆復社諸生而難于爲首者杲曰舍我其誰大鍼大
沮喪銜之次骨及得志將捕諸人興大獄杲猶無所
顧忌爲萬言書上于當事祁彪佳撫吳嘉其義爲築
禮賢館待諸保護甚至大鍼乃募人具劾有徐丞者

應募馬士英卽擬旨逮問副都御史鄒之麟與杲爲
姻連稽其駕帖未旬日而國亾事得解 大兵抵常
州知縣林飾遁邑人王如玉顧君起持冊獻降杲方
起兵以應江上遇之砂山杲怒命所部執之兩人大
呼曰此賊也砂山人方圍練禦盜初不加辨羣起執
杲杲無以自明乃曰願誅如玉君起而後歿砂山人
聽之於是竟被害旣而審其爲杲衆大悔就地立祠
以祀焉

勘本日子方居恒好倚酒罵座每與次尾張髯抵
掌言天下可悲憤事輒痛哭哭罷輒狂歌南都覆
散家財募士千人取道江陰應江上師而遂及於
難吁吾不知子方矯矯者而竟不辯以歿何邪

酉戌後江浙間義旂雜樹有寨主洞主之號廬州馮
宏圖因訛言史閣部未歿假其名召衆遠近信之戊
子春攻英霍六安旬日皆下大江南北忻然謂閣部
尙存也未幾敗歿無爲州吳允宁巢縣葉士章皆以
內應受誅是時英霍間各建旗鼓引寨自主共四十
八所有周損傅夢鼎傅謙之桂蟾義堂和尙侯應龍

王焯之屬周損麻城人崇禎癸未進士授饒州推官
行取御史 大兵逼江西損走福建唐王授兵部尙
書事敗歸家與姪羽儀團練鄉勇知宗室石城王統
錡立飛旂寨乃率募卒數百人馬數千匹歸之夢鼎
貴州人以選貢官泗州教諭獻禦寇策有功擢鳳陽
同知遷安慶知府安慶破出走潛山踞皖澗寨謙之
故潛山典史桂蟾鄱陽諸生嘗從淮上起義義堂和
尙者故公安貢生國變爲僧至是偕歸統錡統錡敗
諸人皆就歿霍山侯應龍與張圖容楊國士等有衆
萬餘人僞佩義勝將軍印與王焯合軍攻霍山不下
退取舒城潛山已而自劉家園出攻獅子寨及南關
拔之營於管家渡又移劄將軍寨己丑正月 大兵
會勦寨破被執俱伏法王焯字定安羅田舉人授涇
川知縣乙酉歸里戊子秋與曹胤昌稱兵破廬州不
守轉戰蘄黃間己丑粵中進兵部尙書總督鳳陽義
軍庚寅二月帥衆連爲潛山太湖之戰旣敗俘至江
寧不屈歿之

勘本曰上江之兵唯以新安金文毅公一旅爲歸

涇則嬰城自保者其餘所在揭竿興義多以遙應
爲名一自輦嶺下績溪石埭出青陽之大通而及
於江江南北之衆應焉一自漁梁出淳安由嚴州
金華涉江而及於浙浙東西之衆亦應焉惟是踰
嶺連江跨吳介越聲應雖衆而志量不齊

王師奮揚迅掃盡滅矣一時江浙間自號寨主洞
主者不過負隅競長也若王篤菴之雄踞大蘭直
於浙東天盡處爲斟鄩計邪梨洲黃氏曰凡爲忠
臣義士之志竭海水不足較其淺深君子亦哀其

志而已矣

王翊字完勳餘姚人王江字長升慈谿人俱庠生有
智畧翊尤強毅魯監國時募卒海濱與防江諸師爲
聲援授兵部職方主事浙東潰翊至舟山說黃斌卿
來襲寧波許內應歸約寧波舉人楊文瓚諸生華夏
屠獻宸楊文琦董志寧王家勤等合兵起事降紳謝
三竇密以告捕夏等入獄斌卿果以舟師至 大兵
擊之去因索同謀者甚急夏慷慨對曰忠義士何可
多得無已則高皇帝與先帝耳以故夏歿志寧脫走

而翊得不名捕遂結寨于四明山戊子春破上虞殺
攝印官故御史馮京第以湖州軍破亦間行入山與
翊合兵守杜魯以巖險爲關提督乃調浙西兵來攻
令山民之團練者爲導遂破杜魯翊以四百人入
天台依威遠將軍天台洞主俞國望久之翊謂部下
曰官兵雖健非團練爲向導則山形險惡未易窺是
山民之不可不誅也乃由天台至四明擊散團練者
兼旬中隨道收合得萬餘人京第久匿民舍至是亦
出已丑春再破上虞忝其知縣得其印當是時浙東
千里之間山寨鱗次屹然相望蕭山石仲芳會稽王
化龍台州俞國望金湯奉化吳奎明袁應彪浙西之
湖州柏襄甫等亦應之其餘小寨支軍不下百數然
皆招集無厲不能不從事鈔掠惟故翰林張煌言軍
上虞之平岡故御史李長祥軍上虞之東山及故都
督章欽臣軍會稽之南鎮則皆且耕且屯而不擾於
民而又單弱不如翊雄翊一旅蔓延四明八百里結
主寨於山之西北境曰大蘭山遂號曰大蘭洞主內
設五營五司五營主軍翊統之五司主餉江任之翊

善治事美必賞惡必誅無偏無縱凡所剖決靡不悅服一時四明之有訟獄者不之官而之翊江善會計量富以勸履畝而稅內地遺老常資屏屨兵毋盜糧民皆安堵以故四明二百八十峯之租賦亦不之官而之江胥吏則無敢下鄉汎兵則遠伏眺望列城畏之若老羸當道城門晝閉甚至疆理官司多具私書薦款一軍獨躋是年六月魯王之健跳翊發使奔問坵貢方物王遣官詣寨授翊河南道御史江戶部主事朝士咸以爲薄時黃宗羲以副都御史從行上言

諸營文則自稱侍郎都御史武則自稱將軍都督惟翊不自張大而兵又最強品級懸絕非所以獎翊且無以臨諸營也是秋翊朝謁舟山擢右僉都御史後會稽嚴我公充招撫使徧歷兩浙而諸寨悉降相繼我公因渡海發使入四明部下左都督黃中道謀諸翊執其使烹之我公愬遁去庚寅春三月再謁舟山晉兵部右侍郎命破新昌拔虎山秋九月王師會討令曰不洗山寨無以塞內顧乃大舉將軍金礪由奉化提督田雄由餘姚會於大蘭軍帳瀰漫

三十里游騎四出仍用團練兵爲導搜剔伏藏翊累戰不能抗遂帥親兵避入海京第以病不能行居灌頂山中爲降將王昇所殺辛卯秋聞大兵三道下舟山翊曰事急矣請復入山集樵亾爲援七月還之山中諸將歿亾殆盡旁皇故寨父老勸之由奉化招兵榆林曰溪間是夜有大星墜地有聲野鳥驚噪父老憂之詰朝二十四日也將由奉化出天台至北溪爲團練兵所執部下參軍蔣士銓從之越日過奉化賦絕命詩其在繫也每日束幘掠鬚謂守者曰使汝

曹見此漢官威儀也比以舟山之役羣帥集定海八月十二日總督陳錦訊之翊坐地抗聲曰成敗利鈍天也毋多言十四日行刑羣帥憤其積年倔强聚射之中肩中頰中脅洞胸者三如貫植木不稍動及截耳剖額終不仆乃斧其首下之始仆時年三十又六其從者二人初不肯跪掠之跪則跪而向主并歿翊旁見者無不泣下曰非獨王公忠其從者亦義士也大兵之入山也江母被縛以之招江江盡削其髮以僧服見時議招徠故國遺臣得安置杭州而防閑之

未幾母以天年終江忽置一妾昵之甚其妻日夜勃
蹊江控之吏出之妻亦攘臂登車歷數其隱微之過
而渡江去鄰舍賊焉聞者無不薄其爲人一日江出
游湖上守者以其妾在不疑久之不返始知向者之
以術脫其妻也江旣得逸攜其妻復入海朝監國於
金門定西侯張名振請爲監軍甲午引師入長江登
燕子磯望祭孝陵賦詩慟哭而還乙未名振卒丙申
有沈調倫者復起山中江赴之人聞其至壺漿相迎
大兵恐其重爲舟山犄角急攻之調倫見殺江中流
矢卒時復有休寧趙立言者亦以餘衆棲山中會江
山諸生李國楹約取江山明年元日立言以三百人
攻克之國楹失期不至越日兵大集立言獨戰連殺
數十人馬躓墜水歿其子楨恨國楹詣其家欲刃之
官兵掩至乃與國楹同受執亦不屈歿

勘本曰王少司馬一字篤菴少孤不善治家其弟
翊以耕讀助之及補諸生好談兵見時方多難思
得一當畫江之役餘姚令王仲擢正中以御史仍
行縣事集民兵從事江上具疏薦之授職方盡以

軍事屬之已而仲撝與同官黃藜洲宗義合軍西
渡江上破黃獨引殘卒入四明結寨觀變山民攻
之去時篤菴方走海隅募兵謀與之合而大兵
購甚急囚其弟翊以招之不顧翊與幕下諸生俱
不屈歿篤菴泣曰是真不負完勲家也因卽以所
募衆入山告父老曰前此諸將橫擾至激變今我
軍足爲是山衛而一無所擾倘念故國其許我乎
遂得結寨大蘭大蘭者唐時裘甫之亂嘗爲巢穴
地險惡猝不可登於是軍日益雄爲諸寨冠戊子

秋朝于舟山時定西侯當國嫌其表貢不由已達
頗伎之篤菴曰吾豈受彼指麾哉大兵南嚮凡
一紙所招多頰首歸命昔惟金華朱督師曾一烹
使至是黃都督引田橫烹酈生之說進曰田橫不
烹酈生於說降之時而款之其志屈矣固願降則
齊之士心已搖豈得復鼓及其後而烹之不已晚
乎篤菴曰善子言正合吾意乃發使邀之我公中
餽先以使至竟醢之篤菴旣歿示寧波西城故
觀察陸公宇燝故都督江公漢以竒計竊藏之遺

一女年十三字藜洲子後没入勲貴家亦自刎死
詳見掖遺從死之二僕一日石必正維揚人一日
明知姚江人

南疆繹史勲本卷二十七終

